

周  
官  
析  
疑

周官析疑卷之七

職內

掌邦之賦入

曰賦入者、惟有九職之貢物、而不兼邦國之九貢也。知然者、大府頒財、別言邦國之貢、以待弔用、而不入於九式也。司會所掌官府郊野縣都之百物財用、則兼九貢、蓋包於官府中。以司會兼致邦國之財用也。職歲專掌式法、所用不外於九賦、而此職逆職歲與官府財用之出、則賦

用不在九式之外可知矣。賦入獨曰邦者。以入於王朝言之也。賦用曰邦國者。九賦所待半用之於侯國也。前曰以逆邦國之賦用者。預計其當用之數也。後曰以逆職歲與官府財用之出者。鈎考其已用之數也。內與出納之納同。黃氏度王氏應電謂縣都之賦留其地以待用。非也。九賦於九式各有所待。鄉郊甸稍之賦亦有留其地者。縣都之賦亦有入於王都者。凡受財者受其貳令而書之。

受財受大府之頒而藏之者若內府外府玉府是也。大府以其令之貳下職內故受而書之。注謂受於職內以給公用非也。凡出財用皆受法於職歲疏謂職內亦有留貨賄之府故得出給益誤矣。

及會以逆職歲與官府財用之出而敘其財以待邦之移用。

財入之數并言官府都鄙而財用之出獨言官府者以守藏言則官府都鄙異所不可以無別。

以出用言則都鄙之財亦官府出而用之也。  
九式之用各有所當一歲中九賦之入有盈歎。  
所待之用有多寡則移其有餘以濟不足故叙  
以待之。會必以歲終當用者不可懸而待也。  
此叙本歲之餘財以待來年之移用耳。

### 職歲

掌邦之賦出以貳官府都鄙之財出賜之數以待  
會計而致之。

九貢九賦九功之入或藏於官府以待王朝之

用或貯於都鄙以待畿內之用出之數九式有  
經制者下文凡官府都鄙羣吏之出財用受式  
法者是也賜之數下文凡上之賜予以叙與職  
幣授之者是也

凡官府都鄙羣吏之出財用受式灋于職歲

受式法不於大府而於職歲何也廩人以歲之  
上下數邦用若食不能人二鬴則詔王殺邦用  
故九式雖有常經而其豐其省則與歲上下故  
必於職歲受之

職幣

掌式灋以斂官府都鄙與凡用邦財者之幣

大府職凡官府都鄙之吏及執事者受財用焉  
此職凡用邦財者卽大府職所謂執事者蓋工  
賈之採辦百物吏民之總領興作者是也

振掌事者之餘財皆辨其物而奠其錄以書揭之  
以詔上之小用賜予

旣曰斂官府都鄙與凡用邦財者之幣則事無  
不該矣而又曰振掌事者之餘財示所振之財

非一類也。幣之發於官府都鄙之吏者，雖有經式而總頒以待用，其數必稍寬。故歲終則斂其餘，與作用財無定數，則事畢振之，皆於掌事者責其實也。曰振者，不振而歸於公，則久之或乾沒，且朽蠹矣。復歸於所司，則擾且紛，故以小用賜予畢之。

歲終則會其出

司會兼總會事，有司各以簿書來會，所憑以鈎考者，職內職歲職幣耳。故三職俱參會事而立。



文各異。職內及會以逆職歲與官府財用之出。但知其出數而已。所用之虛實不可得而知。故不曰贊。以自主鉤考而無所用其贊也。職歲以式法贊逆會。則並核其與式法合否。及所用之虛實。而司會卽憑之以逆羣吏之治矣。故曰贊。謂贊司會也。職幣凡邦之會事。以式法贊之。則兼職內之入。職歲之出。百官府之所會。皆鉤考而贊正焉。蓋其職掌斂官府都鄙。凡用邦財者之幣。振掌事者之餘財。則於財用之出入。虛實。

平時每事鉤考已無微不悉以贊會法掌事者更無所匿其情也宰夫職凡失財用物辟名與足用長財善物者一有微以司會之屬鉤考具得其實耳

### 司裘

掌爲大裘以共王祀天之服

他職曰祀五帝旅上帝獨此云祀天者明此服本共圜邱之祭非四郊所通用也夏秋迎氣無服裘之理况方澤乎且四郊牲玉幣異色則主祭者服必從之大裘惟迎冬可服耳自穎達引

孝經緯鉤命訣謂祭地亦服大裘歷代難之議  
禮者莫能辨不知此穎達之臆說耳孝經緯鉤  
命訣亦無是也彼稱祭地之禮與天同謂其尊  
同性玉之數拜獻之節不異耳玉幣以陰陽異  
色則裘服亦以寒暑異施可知矣且舍大裘其  
餘冕服皆同亦不害其爲衣服之同也屨人職  
凡四時之祭祀以宜服之况裘衮乎

中秋獻良裘

凡裘之材取於冬寒者爲上以鳥獸毳毛細而

溫也獻以中秋蓋上冬所取至將寒而獻之

季秋獻功裘

狐麕羔裘皆宜有良有功注疏尚未別白

掌皮

歲終則會其財齋

齋疑謂泉布也經於掌皮曰會其財齋於典婦  
功曰授女功之事齋蓋練治皮物絲麻所用物  
瑣細故給以布使自備之也外府掌邦布凡祭  
祀賓客喪紀軍旅共其財用之幣齋亦用以通

百物與

內宰

掌書版圖之灋

在版之奄奚其執事有常在圖之宮寢其居處有列所謂版圖之法也王之後宮非外臣所得入也故必給其圖然後可以分人民之所居鄭氏鐸謂小宰所治之王宮乃主之六寢內宰所治之內宮乃后夫人所居非也曰王宮則可兼后宮特小宰與內宰所治之人各異耳凡宮正

宮伯所掌者王宮之羣吏士庶子或布周廬或  
次宮內不與嬪婦相接者也內宰所治奄奚之  
屬與嬪婦時接者也小宰兼掌之故統之曰王  
宮內宰分掌之故別之曰王內

以陰禮教六宮以陰禮教九嬪以婦職之灋教九  
御使各有屬以作二事

三夫人分掌六宮曰教六宮則后夫人兼之矣  
二十七世婦分屬九嬪曰教九嬪則世婦視此  
矣於九嬪復舉陰禮明前舉六宮不敢斥言教

后而三夫人亦與焉。又同是陰禮而承王御下事上儀法亦別異也。特出九御之婦職者以世婦以上無絲枲之功事也。內官不列三夫人而漿人掌夫人致飲於賓客之禮則知次於后而居九嬪之上者有夫人矣。猶師氏保氏不言教太子而諸子職國有大事帥國子而致於太子。惟所用之則知師氏保氏所教國子乃與太子共學者而太子亦在其中。和風翔曰金氏瑤謂世婦以禮選故不待教非也。九嬪乃不以禮

選乎

正其服禁其奇袤展其功緒

內宰所掌無刑者王之嬪御惟宜教以禮作其

事。可。罰。可。黜。而。不。可。刑。嬪婦有過失小則苛罰大則黜遠佐后以治之

者則女史及春官世婦女史職所謂苛罰是也小宰官刑之

建則以正奄寺女奚及司厲所入女奴宮中官

府之徒隸耳

凡喪事佐后使治外內命婦正其服位

康成謂使其屬之上士非也蓋詔后使春官世



婦內宗外宗治之。不言所使以諸職有明文也。  
先鄭謂王命其夫、后命其婦亦非也。記曰：夫人  
之不命於天子，自魯昭公始也。凡爵命必統於  
天子。

佐后而受獻功者比其小大與其麤良而賞罰之。  
鍾旒曰：大小以所成之物言，如布帛錦繡則功  
事之大者，組帶紛悅則功事之小者。小大之中  
各有麤良。

會內宮之財用，正歲均其稍食，施其功事。

膳夫庖人內饗職所共獨王及后世子之食飲  
膳羞則夫人以下皆各使女奚治之故內宰會  
其財用蓋必如此然後事不冗而人皆得其節  
適也用此知古者夫人嬪婦女御爵命雖視公  
卿大夫士然有財用而別無祿秩蓋深居宮禁  
隨身調度及母家姻戚間遺禮幣凡用財之事  
皆包於九式之匪頒好用中內府共王之好賜  
予外府受凡邦之  
用小此古聖王所以謹內治明女教而爲萬民所  
則效也。上經會內人之稍食計所已給也此

均其精食。而又曰正歲均其精食。何也。功事有劇易精粗。所獻有良苦。則精食必有損有益。而後得其平。非歲歲而均之不可。

內小臣

詔后之禮事

內宰以陰禮教六官。故詔后。禮樂之儀。謂動作威儀。整之於躬者。官卿世婦。詔王后之禮事。裸獻薦徹。肅將其事也。內小臣所詔。則禮事之小者。如女賓客見后於宮中。喪紀接外命婦。內外

宗祭祀行於宮中廟中、在車之儀、登下之節、皆是也。知然者、祭祀賓客、王后蒞事於廟、惟內宰、宮卿得贊、而內小臣不得與、宮中喪紀、則內宰不得贊、而宮卿世婦比內外命婦、哭不敬者、而苛罰之、亦無暇詔后以禮事、故專屬於內小臣也。

掌王之陰事陰令

必典章素諳、而後能正王后之服位、必儀文備悉、而後能詔六宮之禮事、必言語謹信、而後可

通好事好令必性行端慤而後可掌陰事陰令  
故羣奄中惟內小臣四人爲上士。

闈人

掌守王宮之中門之禁令

郝氏敬以序官每門四人破鄭注王氏應電又  
謂此專言北宮之中門皆非也雉門以內尚有  
二門故曰每門四人又以明臯門之守不以奄  
寺古文簡核多如此

凡內人公器賓客無帥則幾其出入

幾猶察也。中門所幾獨舉三者以惟內人賓客及持公器者非閤人所敢幾。故惟視其有帥與否。若無帥必叩其所以有徵驗然後出內之士庶子及宮中之奄豎官府之府史胥徒周廬之徒役宮正有版以待之。服器怪民之不宜入者則閤人自呵而禁之。不待言矣。○鍾晚曰注謂須使者符節乃行賓客則掌訝帥以至於朝無所用符節女奚公器而用符節則不勝其擾矣。

寺人

掌王之內人及女宮之戒令

諸職內人注多主女御蓋爲此經內人以下有女宮典婦功職內人上承嬪婦則爲女御不待言也關人職內人則當兼女御及女宮其出入相導寺人職有明文

若有喪紀賓客祭祀之事則帥女宮而致于有司鄭氏鏐破鄭注謂宮卿世婦不宜稱有司固然而謂別有掌祭祀賓客喪紀之有司則誤矣外有司豈可帥女宮而致之哉但注過畧宜曰宮

卿世婦之屬耳

下大夫四人  
中士八人

內小臣內豎職皆

曰祭祀賓客喪紀此職獨曰喪紀賓客祭祀何

也主王后內人而言則先吉而後凶主女宮而

言則先其執事之多而後其少也

王后所與惟  
宗廟之祭賓

客則殯饗饗燕並共籩豆壺漿事校繁重若喪  
紀則兼有喪祭喪賓序哭弔臨女宮執事爲多  
故以是  
爲差

### 掌內人之禁令

前言掌內人及女宮之戒令以下列祭祀賓客  
喪紀之事故戒以所當具也此掌內人之禁令



則禁以所不得爲如膳服踰侈禮度愆忘功事  
廢弛之類。

凡內人弔臨于外則帥而往立于其前而詔相之  
內人宜兼世婦女御二職有明文九嬪以上則  
喪紀之禮事內小臣掌之。注疏謂女御賤故  
立於其前未安非立於其前不可以詔相禮事  
蓋居左右以前也卽內小臣擯王后亦豈能不  
立於前乎但不於詔相王后言之而舉例於內  
人則言之體宜然。

內豎

掌內外之通令凡小事

所通獨小事之令也。知然者王之陰事陰令內小臣掌之不曰掌通內外小事之令而曰掌內外之通令。凡小事者所掌不獨內外小事之令而兼給小事也。

若有祭祀賓客喪紀之事則爲內人蹕

寺人帥內人弔臨不言蹕而內豎言蹕何也。祭祀賓客喪紀內人出入廟中所辟止乃執事之

羣臣惟內豎導行。可使之蹕。若弔臨於外。出宮則闔人爲之闢。在途則有司爲之蹕。不待言也。公卿大夫有事於國中郊野。鄉士遂士縣士皆爲之蹕。則內人可知。祭祀喪紀。女御皆從。世婦惟賓客不與。

王后之喪。遷于宮中。則前蹕。

曾子問。天子崩。諸侯薨。視收羣廟之主。而藏於祖廟。卒哭成事。而後主各反其廟。則喪遷時。羣廟之主。尚未反也。疏謂朝七廟。訖且將行。然後

設奠於太祖之廟、理不宜然、羣廟各有垣門、御  
柩以朝事甚繁重、主不在廟、何事多此勞攘、用  
此推之、卒哭而後、主反雖爲未葬、祭不舉、亦以  
便喪遷之朝、及設遣奠七廟之主、皆式臨之死  
者、與遠近之祖、皆無憾耳。

九嬪

掌婦學之灋、以教九御、婦德、婦言、婦容、婦功、各帥  
其屬、而以時御、叙于王所。

夫人見於經、而祭祀賓客喪紀贊王后之禮事、

掌婦學之法皆首九嬪亦猶三公之下攝六卿而不自列職也。王齊喪及大荒大札天地有裁邦有大故皆出次故曰以時御叙明非其時則不御也。曰以時御則無以著其叙之常曰以叙御則無以著其時之可曰以時叙御又似以當文先後之期言必如是以立文而義乃備。

凡祭祀贊玉盥贊后薦徹豆籩

莫貴於玉盥后親徹豆籩而不徹玉盥何也。豆籩之器與實皆輕。黍盛之質與器皆重。且始以

次陳。后皆親薦以致敬而徹則齊徹。故俎簋並  
使有司職之。特牲饋食宗婦所徹。惟豆籩而佐  
食。徹俎與敦亦此義也。徹玉盥及鼎俎。諸職無  
文。大祝令徹。小祝贊徹。而不目所令所贊之人  
何也。外饗掌外祭祀之割亨。陳其鼎俎。則內饗  
視此矣。凡王祭祀賓客之鼎俎。內外饗陳之而  
膳夫所徹。惟王之胙俎。則尸俎賓俎。饗人各徹  
其所陳。不待言矣。官以饗名。則兼徹玉盥亦可  
推矣。特牲饋食禮佐食亦兼徹俎與敦 凡祭祀司士帥其屬而

割牲羞俎豆則司士亦與徹俎而並及豆籩可知矣。聖經文畧而事無不該如此。據特牲饋食禮推之則后所徹豆籩惟將以燕內賓者燕同姓之豆籩則有司徹之。棗盛炊於饋人共自六官則后設玉齋無疑也。王氏安石據故書謂贊王齋鄭氏鏗遂謂大宗伯奉玉齋小宗伯逆齋肆師表齋盛爲贊王九嬪所贊者王后以爲辨王氏之失而蔽惑又甚焉。贊者贊設時之禮事也。宗伯奉玉齋兼天神地示言之。若宗廟

則攝后耳。后親祭，則后設而九嬪贊焉。無所用宗伯矣。豈可混爲一事乎？至謂禮官贊王九嬪贊后，是一齋而王與后兩設之也。邦國禮亡，凡喪祭，惟據儀禮以推之。特牲少牢，設黍稷者皆主婦贊者。婦人而漫爲異說，何與？贊后之文，設於薦徹豆籩上者，如曰贊后玉齋薦徹豆籩，則似贊后進玉齋而自薦徹豆籩也。

世婦

掌祭祀賓客喪紀之事



爲齋盛者女儻也。世婦蓋監視教導俾水火之齊必得以實簋簠。注云差擇其一節耳。

掌弔臨于卿大夫之喪

王后所不親弔則使世婦往不言公孤不必言也。舉卿大夫則內子命婦之禮同。后與賓客之事而弔事多不親者入諸臣之家也。女巫職若王后弔則與祝前蓋若王之周親則不容不親弔。知非掌王后弔臨之禮事者女御職從世婦而弔於卿大夫之喪。掌弔臨者惟世婦何也。

三夫人尊惟祭祀賓客及宮中之喪紀宜與其  
父母之喪宜歸而弔臨則非所宜及也九嬪則  
掌婦學以教九御凡王后之禮事皆典司焉亦  
無暇及外事且弔事繁多非世婦不能徧共  
鍾輓曰賈疏於大僕小臣弔勞公卿大夫士皆  
曰王有故不親往而引以證此經則曰使致禮  
物非也二職兼勞或致禮物此曰弔臨更不可  
通蓋卿大夫或王之師傅近族姻親則王弔外  
仍當使內人弔臨

女御

大喪掌沐浴

不曰后之喪掌沐浴何也。或王之母非后亦當從后禮。又或后既沒夫人之攝內治者雖儀數有降殺而喪浴亦非女御無共也。注王及后之喪非也。大祝職大喪始崩以肆鬯。泚尸則非女御所掌明矣。疏謂或使婦人共給湯物亦非也。肆師職大喪大泚以鬯則築鬯鬯人職太泚設斗共其鬯鬯則共給湯物不以婦人明矣。經所

以不明著王后者。男不死於婦人之手。士庶人。且然。况天子乎。以外官掌之。則大喪爲王。以婦官掌之。則大喪爲后。不待言耳。

后之喪持嬰

持嬰特舉后。則沐浴稱大喪。示所掌不獨后喪之沐浴明矣。李鍾旺曰。賈疏漢制。嬰戴璧。按喪大記。畫嬰二。皆戴圭。明堂位。雖僞書。亦曰。周之璧嬰。則不自漢始。

女史

掌王后之禮職

於后所行之禮命之曰職。而女史掌之。使朝夕恪勤凜然於職之不易。盡則驕肆懈惰之習無自而生矣。

典婦功

凡授嬪婦功及秋獻功辨其苦良比其小大而賈之物書而揭之

作二事者女御授功乃獨言嬪婦者內宰以婦職教九御使各有屬以作二事九御分屬九嬪

世婦故授功專責之嬪婦使各監省其屬也。知此職所授受獨內嬪婦之功者以獨共王及后之用。又外嬪婦之功典絲典枲受之也。非宮中所繅績。王與后不用而所用兼苦良亦所以勸內職彰女教也。比比次也。絲物之小者纓帶組紉之類是也。其大者則帛紡錦繡枲物之小者巾幕悅績之類是也。其大者則帷幕幄帘大。小賈固不同。或大小同而材有美惡。功有良苦。則賈相倍蓰。故比次而揭之以共衣服則貴賤。

有等以備賜予則輕重有差

以共王及后之用頒之于內府

疏謂以待王及后之用故藏於內府非也內府都受九貢九賦九功之貨賄非王及后之私藏也蓋凡絲枲布帛皆藏於內府其成於內人者則以共王及后之用若夫邦國所貢九職所入成於外工者則以共邦之百用耳王之燕衣服玉府掌之蓋既成而後以入於玉府王氏應電謂內府受良貨賄故頒之以共王及后之用

亦非也。王及后亦有時而用苦功。若在喪之服物是也。惟有苦功。故不頒於玉府。又以示服用之常。宜於儉樸。非若玩好賜予。專取精良也。若王及后世子衣服。可以內府之貨賄共。則九貢九功。何物不備。不宜轉市以外府之泉布矣。

典絲

掌絲入而辨其物以其賈。揚之。

遂師入野職。野賦於玉府。則凡貨賄皆可以當邦賦。使所入有絲。泉則宜與九貢之絲。泉并入。



典絲典泉以頒功於內外工

頒絲于外內工皆以物授之

內工注謂女御非也。典婦功授嬪婦及內人功。則內人卽女御可知矣。此曰工所以別於內官。蓋女酒女漿之類及其奚也。列於天官職者。奚女近千人。其無事之時。必頒功而授齋。可知矣。黃氏度謂外工諸侯夫人大夫妻亦非也。觀魯語敬姜所陳各有職業。無暇受公家之頒。且王禮事所用縑帛組文。非內工及外命婦所能具。

必頒於閭閻之嬪婦。故謂之外工。至王氏應電以外工爲宮卿世婦內工爲九嬪而下益悖矣。或疑外司服所掌王服及賜服兼用此職所頒於外工者。果爾則典婦功以共王及后服之文不宜設矣。蓋此職所頒於內工者。專以共王后之衣服而兼及世子。不足則以外府之泉市之。其頒於外工者。則以共三夫人九嬪世婦女御。以及外命婦之法服。故不設於事官而爲內宰之屬也。至王賜六服羣辟卿大夫與畿內公

孤卿大夫士之命服則宜兼用邦國之幣貢嬪  
貢服貢及民間嬪貢之絲枲冬官別有典司其  
事者既成而後以入於外司服耳

及黻功則受良功而藏之

典婦功所掌王及后之用也宜藏於宮中而頒  
諸內府典絲典枲則本職自藏之何也非嬪婦  
內人所成王及后不用故與九貢九功之所入  
同頒於內府以示其有經式若此職所共皆宮  
中之事不時取用故量所共而藏於本職以便

事耳。日成月要。宰夫旬月而考之。則亦無虞其  
冒濫矣。鄭氏衆謂良功。絲功。縑帛。非也。絲功  
亦有苦。有良典。絲所以獨受良功者。不惟有司  
之政令。如祭祀喪紀所共飾。邦器者所受。非良  
不可。卽上之賜予。亦不宜用苦功也。其苦功不  
言所頒受者。內府掌受九貢九賦九功之貨賄。  
而典婦功所楛良苦之功。並頒於內府。則內府  
受之。不必言矣。

辨其物而書其數以待有司之政令上之賜予

王氏昭禹謂有司之政令若司服弁師所掌非也彼二職乃辨其用等、非製服弁之司、所謂政令卽下文祭祀喪紀所共飾邦器者所受耳、喪紀共其絲纁組文之物

喪紀曰其貴賤各有等也、祭祀亦有等而不曰其以凡該之也、

典臬

掌布總縷紵之麻草之物以待時頒功而授齎

典絲職曰掌絲入者以別於內嬪婦之獻繭也。

此職不曰臬入者麻草皆九職所貢不必言也。曰掌布絲縷紵之麻草之物者麻草之物不獨用於布絲縷紵而典臬所掌惟此也。授齋典婦功注謂來取絲臬非也。據此經曰頒功則已給麻草矣。蓋給以臬布使自具練治麻草之器物兼償其勞也。於頒臬曰授齋則絲可知也。於頒絲曰外內工則臬可知也。

及獻功受苦功以其賈楛而藏之以待時頒

苦功且受則良者不待言矣。蓋典絲職所用糶

畫組就織文絲纒非良不可故止受良功若臬  
物則幕幕巾帨及包物拭器有宜於苦功而無  
所用良者故兼受之若云專受苦功則古者朝  
服且用布則燕私之服可知無轉不受良功之  
理先鄭謂絲爲良功臬爲苦功非也果爾則  
既分二職第曰受其功可矣

內司服

掌王后之六服褱衣揄狄闕狄鞠衣展衣緣衣素

沙

追師注凡諸侯夫人於其國衣服與王后同特  
據明堂位夫人副禕之文不知乃劉歆之徒所  
僞作耳

凡祭祀賓客共后之衣服及九嬪世婦凡命婦共  
其衣服共喪衰亦如之

疏外命婦於后無服據儀禮喪服傳但義有未  
安春官司服凡喪爲天王斬衰爲王后齊衰昏  
義爲后服齊衰服母之義也宜通內外命婦言  
之



縫人

掌王宮之縫線之事以役女御以縫王及后之衣服

王氏昭禹謂女御非王宮八十一之數非也王后之衣必內人典司非於女御取之則並謂之女工可矣惟繫內人而非女工之比故奄人爲之役

掌凡內之縫事

凡內之縫事則不獨衣服也不獨王與后之衣

服也

染人

掌凡染事

鄭氏鐸引禮記謂宮中所染專共王祭祀之服、染人所掌以共國家禮事非也、記所謂朱絲之元黃之卽以付染人耳、

追師

掌王后之首服爲副編次追衡笄

據此則詩曰副笄六珈、記曰夫人副禕、皆周禮

之末失也。豈二王之後用之。而其後列國皆僭如酸。畢之及尸君與。

爲九嬪及外內命婦之首服。

三夫人亞王后內官列職。自九嬪始。舉九嬪而言及。則內命婦爲世婦女御。闕矣。不可以先公卿之妻。故曰外內內宰職。正喪之服位。則曰內外命婦。兼夫人及九嬪也。凡並舉命夫命婦。則曰外內者。命夫多王之師保周親也。此經不統之曰。內外命婦者。正服位辨舄屨及出入可統。

稱內命婦追師之設本以共后夫人九嬪之首服而因及於外內命婦故別言之。

屨人

辨外內命夫命婦之命屨功屨散屨

追師職曰爲九嬪及外內命婦之首服此職第曰辨者命屨初命時官給之其後則與功屨散屨皆自爲與銜笄用玉石可服上賜以終身者異故第辨其法式也。

夏采

掌大喪以冕服復于大祖以乘車建綬復于四郊  
祭僕復於小廟隸僕復於小寢大寢而大祖四  
郊之復則屬夏采者大祖四郊爲祭之冕尊王  
泄事贊王者冢宰故特設此職於天官以領復  
事而他無所掌也。復者人之終也春秋傳胥  
侯有疾秦醫和謂趙孟曰國之大臣榮其寵祿  
任其大節有災禍興而無改焉必受其咎今君  
至於淫以生疾將不能圖郵社稷禍孰大焉主  
不能禦吾是以云也王之宮寢內外起居飲食

無一不關於冢宰。必君之身終而後師保之責盡焉。此天官之屬所以終於夏采也。

李光坡曰：冢宰貳王統百官均四海而諸官所掌不越居處服御財賦絲枲之事。嗚呼！此聖人之議道自己者也。蓋飲食男女人之六欲存焉。自公卿以下至於庶人。或有所制而不敢縱。或有所求而未必逞。若尊爲天子富有四海。何求而不應哉。何憚而不爲哉。以是大欲而勢足以恢其邪心於以治天下國家。吾不知其可也。周

公知百官之得其統。四海之得其均。其要在王。身是故先以宮室安其身焉。次以飲食理其體焉。繼以賦式節其用焉。終以內官佐其德焉。析其事則至纖至悉。若無關於政治之要。而觀其用意本末兼修。內外交飭以正君身。其至醇至備者乎。一之以大宰之權。分之以小宰內室之任。一起居一飲食一貨用一擇採進御。多寡豐約用舍去取。大臣皆得與聞之。而天子不得以自私。女子小人不得以竊惑。而同是職者必名。

德之選。是以上知之君就焉而益。正中材之主。守焉而寡過。蓋正心誠意之實功。而治天下國家之本統也。



周官析疑卷之八

臨桂陳榕門

漳浦蔡聞之同訂

桐城方苞著

新建周力堂

地官司徒第二

惟王建國辨方正位體國經野設官分職以爲民  
極乃立地官司徒使帥其屬而掌邦教以佐王安  
擾邦國

成均所教秀民而已。土地人民皆隸於地官而

親民之吏屬焉。必地官掌教，乃能盡天下而無一人之不教。此古之聖人所以明明德於天下，而非漢唐之治所可及也。司徒會五地以辨物生相土宜，以安民宅，分三壤以均賦貢。別年歲以制力征，凡所以除民之害而厚其生者，皆所以安之也。十有二教，三物八刑，凡所以因事成禮，隨時讀法，皆所以擾之也。安之中亦有擾，擾之道卽所以爲安。地官職事無外於此者，不曰安擾萬民，而曰安擾邦國，何也？舉萬民則不

足以該邦國、舉邦國、則安擾其民、卽所以安擾  
邦國具見矣、

鄉師

六鄉四面而環、王城鄉師四人、宜各主一面、而  
注謂兩人共主三鄉、蓋以同鄉之州不宜中分、  
而各有所屬、且以備有故而兼攝也、

鄉老

小司寇掌外朝之位、三公及州長、百姓北面、此  
三公統鄉民之禮也、三公雖無專職、而散見於

朝士司士皆職者甚詳不當以六官之上無三公爲疑

鄉大夫

周官六卿之外別無所謂卿者軍旅田役喪荒賓客大司徒小司徒鄉師主之五官皆有事焉而鄉大夫一無所預以是知其卽六卿也鄉大夫遂大夫以下皆無府史胥徒鄉大夫乃六卿不與民治州長遂大夫以下則其屬吏轉而相承身親其事無所用之六卿兼鄉官故凡軍

農田役皆鄉官令其屬中民而致與大司馬軍  
刑皆命鄉實相合鄭注大司馬謂軍帥不特置  
乃選於六官六鄉之吏者蓋武事壯猷六官之  
長或有喪疾事故則退老於鄉者亦可簡任以  
承其乏耳賈疏乃據此謂鄉大夫別置而非六  
卿誤矣凡治經者不能析衷義理推究事實但  
據經中一事一言以強證已說皆不可信况漢  
儒之訓詁乎

族師

百家之長。卽以師名官。則當正州長以上。掌教治者。其德行道藝之足以表衆可知矣。記曰。能爲師。然後能爲長。此古之民所以易於觀感。興起而政教無壅也。

封人

所謂封疆者。封土於界上也。其職云。凡封國。封其四疆。則舊說謂典封疆之官。本無可疑。鄭氏鐸之說。顯與經悖。

鼓人

鼓人所掌六鼓四金之節、用於祭祀軍旅出役、喪紀災禳夜藝、鄉遂都家公邑無地無時不有事焉。不獨秀民能辨其音聲、卽阡隸亦知其節會。乃教事之重大而周徧者。故次封人、鄉師、四時出田法以教戰、金鼓所以爲車徒之節制也。次舞師、坐作進退擊刺之法、皆於干舞備之。平時習舞、然後前期可修戰法。

牧人

載師任遠郊之地、有牧田牛田、卽牧人牛人畜

牧之地故牧人牛人充人同屬地官

### 縣師

注自六鄉至邦國縣居中故名縣師非也小司徒井田野九夫爲井四井爲邑四邑爲邱四邱爲甸四甸爲縣四縣爲都遂人造縣鄙形體之法五家爲鄰五鄰爲里四里爲鄣五鄣爲鄙五鄙爲縣五縣爲遂遂與都之政治皆至縣而分執其總其法蓋通乎天下此職通掌天下之地域作軍旅田役之卒伍故以縣名官不宜以小



都之縣居中爲義

保氏

師氏中大夫保氏下大夫則非三公之師保明  
矣大戴記稱周公爲太傅召公爲太保乃六卿  
上兼三公之位而非此經之師氏保氏也後鄭  
誤引以詁此職魏氏之說得之

司諫

先王之世所以教閭閻之秀民則有家塾黨庠  
州序之師教王世子王子王族則有師氏保氏

而又合之於成均。所以陶冶學士者。法無不備矣。然學士而外。農工商賈。下逮隸圉。有一人之不教。則聖人之心。惻然有隱。而於政教。必有所塞。惟學士始可責以六德。六行。六藝之備。至於平民。則循理奉法。爲善去惡。其實事。卽在政役。弛舍發徵。期會農桑。衣食遊居。作息之間。故別立司諫司救之官。巡問而觀察之。糾德正行。考藝辨能。以勸其從。誅惡警過。三讓三罰。以懲其違。所以德教蒸於四海。而可致刑措也。

媒氏

民相怨讐、及合婚姻、隨地而有之、和之以解其難、合之以厚其別、皆所以明彰禮義、故屬地官、然後事便而教習也。

質人

民間交易、或相期約、而不能立判、官之取于斂、除或以事故、而難踐前期、故設質人、掌其質劑、書契、以息抵冒、正辨爭、注謂主平定物價、誤矣。

廛人

制官所是

卷之八

民居亦曰廛。但廛人爲司市之屬，則爲市廛。明矣。疏引載師以廛里在國中之地，而謂主斂貨賄、停儲邸舍之稅，不知貨在肆始稅其廛，邸舍則民居也。安得有稅？載師本謂市肆爲廛，民居爲里，後鄭辭未別白，而引之以證邸舍有稅，不亦蔽乎。

### 胥師

凡有爵者必稱士。故知胥師以下非官也。比長治五家，卽假以下士之名。胥師、賈師治二十肆。

而仍與羣胥伍以是知古之賤末而貴農也惟  
不假以爵故王都而外鄉遂都家公邑凡小邑  
聚有列肆者守土之吏皆得辟除以治市政又  
所以使民而恤商也鄉大夫所賓興半農家子  
而未聞工商得與焉西漢之初有市籍者子孫  
不得推擇爲吏所以使民榮義而輕利民食之  
豐匱風俗之淳漓恒必由之

司越十肆則一人司稽五肆則一人

司越所禁者顯故十肆一人司稽所察者隱故

五肆一人

司門

鄉之官、以上大夫主之、遂之官、以中大夫主之、  
門市之官、則以下大夫主之、輕重之差也、每門  
下士二人、而主之、以下大夫、蓋王城管鑰之任、  
非位尊權重、不能防閑而糾詰之也、

司關

門關皆府一人、史二人、書契簡也、徒四人、而無  
胥、卽此見商旅之無擾矣、王氏應電門關無

兵守云云、乃以唐宋以後之政俗、議周公之典、  
法言之不中、無足怪也。自管仲用齊而變周禮、  
始分士農工商之鄉、周官掌固司險所掌守政、  
聯衆庶與士庶子爲一體、無問國中郊野閭族、  
州黨之民比戶而居者、皆兵也。國有大故、鄉大  
夫令民各守其閭、以待政令、則國中四郊之守  
已固矣。大司徒令無節者不行於天下、都鄙公  
邑城池之固、牧長與其民守之、山林川澤之阻、  
掌固司險與其屬守之、無在而非兵也。其平居

無事門關之守不遺稽察無節傳及貨賄不物者故每門每關府一人史二人徒四人已足以待其事無所用衆也。司啟閉者不過下士無所用威權也。後世門關之操柄日重卒隸從衡侵削商民阻抑行旅自孟子時已患其爲暴然後知周公之憂民切慮慮深也。

送人

注謂六送之地自遠郊達於畿中有公邑家邑小都大都非也。六鄉六遂而外凡造都邑皆縣



師量其地、辨其物、而制其域、以歲時徵野之賦、  
貢則稍縣、置乃縣師所掌也、

縣師所掌地域人  
民田萊六畜車牛

之數兼甸郊邦國者以受法  
於司馬以作衆庶會卒伍

六遂獨百里至二

百里地、遂大夫所兼掌、不過公邑之吏治耳、遂  
人通掌縣鄙溝涂形體之法、故曰以達於畿、非  
畿內通爲遂地也、六遂之吏所掌穡事爲多、

如有天時地澤風雨之急、移用其民、皆刻不可  
緩、若官府設於王朝、必待稟命而行、則緩不速  
事矣、考秋官遂士掌四郊、謂獄之治在四郊也、

以類推之、遂人遂師治所亦當在四郊、劉氏錄謂居司徒之府、王氏與之謂居朝以總六遂之事、皆妄說也、

### 遂大夫

近世諸儒、因鄉大夫卽六卿、謂遂吏亦兼以王官、非也、五官之屬、自師及攷而外、爵中大夫者十有八人、爵下大夫者四十有五人、而鄉之州長、爵中大夫者二十有五人、遂人遂大夫、爵中大夫者八人、遂之縣、正州之黨、正爵下大夫者

百有五十人。盡六官之中。下大夫尚不足以充之。况治官之大府司會內宰。教官之師氏保氏。司市司門廩人。禮官之冢人墓大夫。大司樂大師。大卜大史內史中車。政官之射人諸子。大僕司甲司弓矢。戎右齋右大馭。戎僕齋僕。職方刑官之大小行人。皆各有專司。職重屬多。事繁地近。皆必不能兼。鄉遂之治。教政令而遙相統攝者也。以義測之。惟遂人遂大夫。或可以六官之攷。晉秩而兼攝之耳。其餘鄉遂大吏。或鄉遂之

上士積功累勞者漸次拔擢以任其職而爵秩  
得班於王朝之大夫其貴重則不能與王官並  
如後世京職與外吏爵列等而儀位則有差耳  
遂無老遂大夫亦非卿蓋三公官不必備六  
卿九牧之倡位尊望重名不可以輕假也且鄉  
法通於畿內以公卿掌鄉治則畿內吏民皆當  
是則是效有所觀感而興起矣

旅師

遂之賦粟里宰徵之遂人遂師令之入於廩人

倉人其餘留於野并鋤粟屋粟閒粟掌於旅師方春耕民有不足則瀕之待秋成有餘則斂之其新阡初徙者不獨散其利且施其惠而不責以償遺人職所謂野鄙之委積以待鞫旅是也故官名旅師後鄭謂旅師乃爲縣師斂野賦穀之官詳本職並無此意鄭氏蓋以縣師徵野之賦貢而此職掌聚野粟不悟此謂六遂之野耳郝氏敬謂鄉之閭師遂之旅師其職事蓋互見非也鄉自州長以至閭胥無徵賦之事故別

設閭師以掌之。遂則縣正掌其徵比矣。無事復設官以徵賦。蓋六鄉地狹人衆，不足以容旅民。故旅師設於甸遂，裨內而四郊外，而公邑家稍因荒就食，而願留處者，有所依庇而收恤焉。縣都廣遠，卽有移民就食之事，亦各於封內擇地以處之，非王官之所及也。

稻人

遂人掌縣鄙溝涂，其法達於畿內。故旅師至稻人六職，次於遂人之下，所主俱郊野米粟兵車。

芻薪與糞種耕作之事蓋與遂人相左右者也  
山虞

山澤利多爭訟易生竊盜時發必官爲之守而  
民以時取然後生物阜而惠澤均故官司徒隸  
不得不衆繁也

林衡

麓接平地視山木爲難守大山之麓有隄爲大  
林者故別設官而增胥徒之數

澤虞

於林麓總言之於澤藪分言之者麓多爲林而澤藪地各異也。

### 掌蜃

李氏如玉謂自角人至掌蜃七官所斂卽山澤之賦非也。閭師職任虞以山事貢其物任衡以澤事貢其物山貢之大者乃邦工掄材及取金玉錫石澤貢之大者乃蒲葦之共及財物入於玉府者此七職所斂特細物耳。謂縣師徵野之賦卽甸稍縣都四賦亦非也。六遂之賦遂師徵



之里宰斂之則非縣師所掌明矣。遂師徵財征入野職野賦。遂大夫令爲邑者會政致事。又戒凡爲邑者之功事則公邑之賦並掌於遂師明矣。縣師所徵乃家稍縣都之賦而無公邑亦明矣。

場人

本職曰國之場圃則爲載師所任而非農家之場圃可知。注疏並誤。

廩人

廩人掌國用而不藏粟米。猶大府掌頒財而不藏貨賄也。蓋舍人掌凡祭祀賓客喪紀之米穀。下及宮中之財守。則膳夫之六穀。彙人內外朝。冗食者之食。凡國中所用之米。皆藏於舍人可知矣。倉人掌粟入之藏。凡國之大事共道路之穀積。食飲之具。則畿內所用之粟米。皆共於倉人可知矣。以廩名官。謂舍人。倉人。廩藏之出入。皆受法於此職耳。注疏藏米曰廩。對下倉人藏粟曰倉。似誤。胥徒較舍人倉人幾八倍。蓋雖

不掌蓋藏而徵令傳送之事紛口會同師役治糧與食必使各就其地分部以稽察冒濫也。

### 司祿

古者分田制祿位有升降則祿有增減人有存亡則田有遞代故特設司祿以專掌之王氏應電謂卽廩人九穀之數非也廩人所掌以待匪頒賙賜乃正祿外之法用耳若當官羣士之祿旣頒以田又使入粟於廩人而後給之則徵收轉輸期會出納勞民耗財費時失事而義無所

取聖人立法不若是其膠擾也。易氏被謂獻穀數宜與司民之獻民數同亦非也。民數三年而一校其息耗穀數必每歲而獻之。

司稼

廩人舍人倉人司稼四職相聯而終之以司稼以年之上下出斂法司稼之職也。官府之餼萬官之祿皆於農夫取之。歲有豐凶而法用常祿。則不能不取足焉。所以示居民上者當惕然於安受野人之養而職思其艱也。在禮年穀不登。

君膳不祭肺、馬不食穀、大夫不食梁、士飲酒不樂、則司稼所謂闕其急、平其興、以均萬民之食、必自貴者始矣。春秋時、列國有凶、卿大夫爭出私積以賑貸、猶見三代君臣與民同憂之義。

### 春人

春人職所領女奚數甚少、蓋夫人親春、以共齋盛、故女奚助以終事、若牢禮饗食之米、特取之廩人而差擇之耳。

### 稟人

橐人職領以女奚者婦人主饋日官吏人民給事宮中者必女奚供食乃便而因通給外朝之食也。春人橐人其事較饕人爲繁重而饕人奚四十人春人橐人奚止五人者以春橐給役者有司厲所入女奴而女春女橐及奚特監視而指揮統治之耳不列女奴及其數者以司厲職有明文且以罪入數不可定也。